



2008-2009


Intermédiaire

Document étudié n°4

Lecture de documents anciens

novembre 1286. – Abbaye de Molesmes

Lambert dit Bodins et sa femme font don de leur biens à l'abbaye de Molesme



A touz ces qui verront et orront ces présentes lettres, frères droués, abbés et touz li couvenz de l'eigglise de Moloimes, salut en notre seigneur, saichent/ tuit que cum Lamberz diz Bodins de Ricé et Margueire sa famme aient donné, quicté et outroïé en pure aumone à nos et à notre esglise de Mo- loimes lour maison qui fu Garchom, une grange lour devant leu four, lour maison selonc Robert Saussier, lour grange dou pont, lour grant/ maison neuve, lour vigne de Vaulongrand, lour vigne qui fu Galam en Chanses, lour vigne quandit rotie, lour grant vigne de Chanses/, lour vigne des Crees, lour vigne dou Chatele, lour vigne de la Noie Boissellainge, lour pré de la Cortainne, lour pré dou Brinant, tele/ partie cum il ont au pré avec les malades, leu quart de demie seyée avec Sauget, une seyée dou pré Boton, lour pré dessus la Folie, lour lonne/

Archives départementales de la Côte-d'Or, 7 H 735

Archives départementales de la Côte-d'Or
www.archives.cotedor.fr





2008-2009

Intermédiaire

Document étudié n°4

Lecture de documents anciens

selonc leu molim, la terre derrière la maison neuve, lour meis devant leu molim,
lour meis qui est en Auterive et nos aient quicté/
touz les harietaiges qui movoient de notre esglise et que nos lour avoies
donnez à lour vies et avec tout ceu il nos aient donné/
et quicté, touz lour autres biens meubles et non meubles queconque il soient et
en queconque leu il fuent. Des quelz chouses, harietaiges/
et meubles il se sunt ja desvectuz et en ont revectu frère Pierre Moinne, notre
chamberier en nom de nos et de notre esglise de Moloï-/
mes. Nos, pour la grant affection et la grant devocion que li diz Lamberz et sa
famme ont ades heue et ancor ont à notre esglise, les a/
compaignons et façons participans de touz les biens qui seront faiz deci en avant
en orasons et en aumones en notre esglise et es membres/
de celi et lour prometons à un chascun d'aux autant de servise après lour décès
comme à l'un de noz frères, et en récompansacion/
dou don devant dit fait à nos, nos donons et outroions au devant dit Lambert et
à Margueire sa famme tant qu'il vivront chascum/
an dix muix de vin bon et souffisant à la mesure de Moloimes et prévande de
pain conventual chascun jour pour un chascum/
et prévande de pain à converse chasun jour pour lour beasse et vint et cinc soz
tornois chascun an pour un porc vif et toutes les/
semaines quand maingera char, doux fromaige prévandaux, et en la karoime et
ans avanz chascun jour quatre arans ou doux generaux/
tex cum li couvenz aura, et chascun am un bichet de pois et un bichet de fèves à
la mesure de Moloimes. Et chascune semaine/
une charreté de buiche et doux soz tornois por pictance à paier à aux leu
diemonge, et chascun am doues paires de bones robes soufisantes/
à aux tant qu'il vivront ansamble, et l'um daux mort, cil qui sorevivra aura
soulemant la moitié de toutes ces chouses devant dites, fors/
que tant qu'il aura prévande de pain à converse avec la soue prévande de pain
conventual por sa beasse. C'est à savoir cils deux qui sorevivra aura sa single/
prevande de pain conventual et prévande de pain à converse per sa beasse, cinc
muix de vin chascun am, en la quinzaine une charreté de buiche, chascune/
semaine douze deniers et un fromaige prévandau ou chascun jour tel généraul
comme li couvenz aura chascun am un metion de pois et un/
de fèves et douze soz et six deniers pour un porc. Et aux morz, nos et notre
esglises seront quicte et assos de ce dom devant dit/
fait audiz Lambert et Margueire sa famme à lour vies si cum il est dessus dit. Et
toutes ces chouses devandites si cum elles sont ci dessus/
escrites et devisées mot à mot, nos lour promettons à tenir et à garder
fermement sans corrompre et sanz aler ancontre en tout am partie/
de queque chouse que ce soit. Et pour ceu que ceu soit chouse ferme et
estable, nos, abbés et li couvenz de Meloimes devant dit avons/
mis noz seaux en ces lettres que furant faites l'am notre seignour mil doux cenz
quatre vinz et six, leu sambadi après les hui-/
tannes de la tout sainz et les avons bailiés et délivrés au commandement dou dit
Lambert et sa famme saelées de noz seaux/.

Archives départementales de la Côte-d'Or
www.archives.cotedor.fr